

Mihimihi – Te Mutunga Iho

Naia tā koutou mihimihi hou. Ko tā koutou ko te whiriwhiri i tētahi kōrero nō tēnā, nō tēnā wāhanga. Āta wānangahia ngā kupu kia whai māramatanga, me niwha ki te rae hoki ngā kōrero katoa kia tū kaha ai koe. 'Kia rāka ngoi kia eke a Tangaroa!'.

He mihi ki te/ngā ātua.

1.) E tō mātou matua i te rangi, te tīmatanga, te whakamutunga me te waiora o ngā mea katoa. Nāu ko te ao, nāu ko te pō, nāu anō ngā āhuatanga katoa i whakatinana hei wāhi oranga mō mātau te hunga ora. Kororia ki tōu ingoa tapu.

2.) Mokori anō kia rere tonu ngā owaha nui whakaharahara ki a rāua, ā, ko rāua tērā e tauwhiro ana, e tūpore ana i a tātau i te ao, i te kengo. Arā, ko Ranginui e tū iho nei rāua ko Papatūānuku e takato ake nei, e mihi ana, e mihi ana.

3.) Rā atu, rā atu ka rere kaha ngā mihi nui taiooreore ki a koe e te Atua. Nāhau tēnei ao i whakairo hei wāhi oranga mō mātou te akunga ora nei. E kore rawa ngā mihi e mutu ki a koe.

He mihi ki te kaikarakia

1.) Nei rā āku owaha nui ki a koe e te kaiurungi o tō tātou waka mō te wiki nei. Nāhau tō tātou rangi i tūwhera kia āiopīpī ai ngā āhuatanga katoa mō tēnei rā. Ka mihi ake, ka mihi ake.

2.) Ka pī atu ahau ki a koe e te amorangi mō te wiki, ā, ko koe tēnā e pupuritia tonutia ana te tikanga ukiuki a ngā tūnohunohu. Kei te mihi, kei te mihi.

3.) Ka tāhuri atu āku owaha ki te kaingārahu o te ata nei. Nāhau ngā mihi i tuku ki te wāhi ngaro kia tau mai te manaakitanga ki runga i a tātou. Nō reira tēnei au e mihi kau ana ki a koe.

Mihi ki te kaiwaiata

- 1.) Ki a koe e te kaiwaiata, kātahi anō ko te wheko waitī a te manu ko tēnā. E kī ana, 'Me he korokoro tūtī'.
- 2.) Ka anga atu au ki a koe e te manu tīoreore o te ata nei. Anō nei ko te tangi waiwaiā a te kokako. Ā, kei te oha atu au ki a koe.

He mihi ki ngā pouako

- 1.) Ki a koutou ngā mātanga o te mahi whakaako. Rā atu, pō atu ko koutou tēnā e whakarirā ana kia tohaina mai ngā tikanga tuku iho a ngā mātua tūpuna rā. Nō reira e kore rawa ngā mihi e mutu ki a koutou.
- 2.) Ka tahuri atu āku mihi ki a koutou, te hunga houhare o te kura nei. Ahakoa te aha, ko koutou tēnā e kaha tiaki ana i te kanaku o te mātauranga kia āhuru ai tā mātau wā ki te kura nei. Nō reira kei te rere kaha ngā mihi ki a koutou.
- 3.) Naia āku mihi nui taioreore ki a koutou ngā tautōhito o Te Korowai Whakamana o Ngai Kete hoki. Ehara i te mea he mahi waingōhia te mahi whakaako, nō reira koutou, ko ahau tēnei e kaha mihi ana, e kaha mihi ana.
- 4.) Nei rā ngā owaha nui whakaharahara ki a koutou te akunga ihu oneone o te kura nei. Ko koutou tēnā e pukumahi ana ki te tuku mai ngā mātauranga kia mārama kehokeho ai mātou ki ngā momo āhuatanga o te ao nei. Nō reria, nei āku mihi kau ki a koutou.

He mihi ki ngā tamariki

- 1.) Ki ōku tuakana, ki ōku tuahine (ki ōku tūngane) kua waihape mai i tēnei ata, kia kaha tonu rā tātou ki te piki ake ki te tihi o tō tātou ake maunga mātauranga. E ao tonu ana te whakataukī nei, 'Whāia te iti kahurangi ki te tūoho koe me he maunga teitei'.

2.) Ki ōku pākanga kiritahi, ki ōku matamatahuānga kua tōpū mai nei kei raro i te tuanui o tō tātau karuhi, nei rā anō āku owaha nui ki a koutou. Me whai tonu e tātau tērā kaupapa a mahi tahi kia ora pai ai, e kī ana 'He tokomaha ki te mahi kai, ka hinga te hoariri'.

3.) Ā, ka huri atu ahau ki a koutou ōku hoa, te hunga pīkoko ki te reo me ōna tikanga a ngā pēperekōu kua hoki atu ki te whenua taurikura rā. Kia kaha tonu rā e hoa mā ki whakatinanahia ngā maruāpō a kui mā, a koro mā.

4.) Ki a koutou ōku āpiti o te kura nei, kia kaha tonu tātou ki te whai i ngā tikanga ukiuki a ngā mā tāpuputu rā. Nā rāma kē tēnei ara i takatū kia tū tātou hei tamaiti māia ki te ao nei. Whaia tāhau ake raukura hei hoa pūmau mō koutou ko hinengaro, ko whatumanawa.

Te Kaupapa / Pēpeha

Whakahuatia atu hoki e koe tō pēpeha.